

SKUPŠTINA KANTONA SARAJEVO

Klub samostalnih zastupnika

Goran Akšamija

Sarajevo, 05.12.2016.

Zastupnička pitanja i inicijativa za 23. Redovnu sjednicu SKS

Vlada Kantona Sarajevo i Ministarstvo zdravstva

Pitanje br. 1

Upravni odbor ZZO KS-a sa predsjednikom Hamidom Milakom na čelu donio je Pravilnik o načinu korištenja i upotrebi mobitela u službene svrhe u Zavodu zdravstvenog osiguranja KS . U članu 5. pomenutog Pravilnika stoji:

“ Korisnicima mobilnih telefona u vlasništvu Zavoda ili radnika priznaju se troškovi korištenja tih uređaja do utvrđenog ograničenja za kalenderaski mjesec, koji iznos ne obuhvaća porez na dodanu vrijednost, kako slijedi: Direktor 2000,00KM “

Kada sam potpuno šokiran prilikom da u Dnevnom listu "Oslobođenje " od 23. 11.2016 pročitam Član 5. ovog Pravilnika (bolje rečeno Kodeksa besčašća i zloupotrebe) nisam mogao ni pomisliti da može da slijedi slijedi Član 6. koji definiše da nije dovoljno mjesечно 2000,00 KM +PDV za troškove mobilnog telefona, nego za svaki slučaj Direktor može posebnom odlukom korisniku odobriti korištenje mobilnog telefona za neplanirane dodatne troškove u roamingu za vrijeme službenog putovanja u inostranstvo i to u iznosu uvećanom za 10% od utvrđenog iznosa iz člana 5.

Mislim da ovoliku količinu beščašća i bahatosti i rasipanja sredstava osiguranika treba odlučno osujetiti i sankcionirati. Mi ovdje govorimo o stanovitim reorganizacijama u zdravstvu Kantona Sarajevo, usaglašavanju sa Zakonom o zdravstvenoj zaštiti, štednji i slično , kao i namjerama ove Vlade da građanima omogući racionalnu, ali efikasnu zdravstvenu zaštitu. Iskreno

se nadam da ovakvi Pravilnici nisu dio operativnih radnji ka ispunjenju tih zacrtanih ciljeva.

Koji kriterij i koji Zakon dozvoljava ovakve službene ovlasti upravljačkim strukturama i direktoru? Postavljam pitanje i molim da mi odgovore i Premijer i Ministrica zdravstva pismeno koje su mjere poduzete prema ovim upravljačkim strukturama.

Da li su Premijer, Vlada KS i Ministrica zdravstva KS pokrenuli smjenu UO i Direktora Zavoda zdravstvenog osiguranja KS? Ako nisu zašto nisu?

Istovremeno pokrećem neformalnu inicijativu prema svim zastupnicima Skupštine KS da me podrže u zahtjevu za smjenu UO i direktora Zavoda zdravstvenog osiguranja KS i da svojim potpisima i svojim javnim glasom protiv ovakvih radnji pomognu da pokrenemo zajedničku formalnu inicijativu za smjenu ljudi koji ne pokazuju ni minimum senzibiliteta i odgovornosti u ovim teškim vremenima. To će ujedno biti prilika da pokažemo kako ova Skupština KS štiti dostojanstvo građana KS i ne predstavlja samo protočni bojler za ovakve vrste beščašća i zloupotrebe pozicija.

Ujedno postavljam pitanje kako ćemo imati povjerenje u najavljenu reorganizaciju u oblasti zdravstvene zaštite kada je već jasno da se racionalizacija vidi po nedostatku velikog broja reagensa u bolnicama, velikom broju lijekova koje građani sami plaćaju kao osiguranici i većinski finansijeri zdravstvenog sistema, dok oni kojima je dato da upravljaju unutar tog sistema kao što je slučaj trenutnog UO i Direktora Zavoda zdravstvenog KS, racionalizaciju definišu na sasvim drugi način po sistemu "od tvojih para meni sve, a tebi osiguraniku šta ostane".

Ukoliko se to ne desi onda znamo da je racionalizacija i štednja samo selektivna i da se novcima iz sredstava doprinosa zdravstvenog osiguranja umjesto zdravstvene zaštite plaća nešto sasvim drugo.

Za namjere bilo koje vlasti jednakost i pravednost u zdravlju je ogledalo šta zapravo žele promovisati kao ključni sistem vrijednosti. Iskreno se nadam da ovo beščašće, pa makar se donese i neki novi Pravilnik po ovom pitanju u Zavodu zdravstvenog osiguranja KS pod pritiskom javnosti, neće ostati nekažnjeno, u protivnom to će za sve biti još jedna od bezbroj bolnih poruka koju aktuelna vlast šalje građanima po principu stare arapske izreke "Psi laju, a karavane prolaze".